



# Brunchs pigns e sunatibas ein il trend – plaids da fiasta dameins

Dumengia proxima festivescha la Svizra siu di naziunal. Suenters che pli u meins tuts arranschaments ein curdai igl onn vargau pervia dallas malsegirtads en connex cul coronavirus, s'avischinan entgens loghens uonn alla normalitad. Tschercarai fetg ein ils brunchs, era en Surselva ein entgens gia reservai entochen sil davos plaz.



**Brunchs pigns ein il trend uonn alla fiasta naziunala, era en Surselva. Il diember da participantas e participonts ei denton limitaues.**  
 HANS HUONDER/FMR

Per biaras e biars ha la fiasta naziunala entschiet ils davos onns cun in brunch. Avon che la pandemia fetschi sias capriolas, vegnevan entochen 350 organisai da puras e purs ell'entira Svizra. Leutier vegnevan numerus brunchs organisai ordeifer menaschis agricols. 2020 – igl emprem onn dil coronavirus – ha l'Uniun purila svizra dumbrau 150 brunchs, pia gnanc la mesadad dils onns avon. «Uonn separticipeschan 204 menaschis

al brunch dalla fiasta naziunala. Cun quei diember essan nus fetg cuntents», di *Laura Berchtold*, menadra da project dil brunch digl emprem d'uost tier l'uniun purila. Abstrahau dils brunchs ch'ei d'entantai ina part integrala e divertenta da sentupada pil di dalla fiasta naziunala, regia buca gronda truscha da fiasta. Biaras vischnauncas desistan era uonn da fiastas pervia dalla pandemia. Memia ditg seigi ei buca stau clar tgei che seigi pusseivel el

rom d'arranschaments pli gronds, eis ei stau d'udir d'ina vart ni l'autra d'autoritads communalas.

## Brunchs era en Surselva

«La gliעד tscherca puspei caschuns da s'entupar. Quei sentin nus clamein tier quels brunchs. Per quei motiv ein plirs lu era gia occupai cumpleinamein», di *Laura Berchtold*. En Surselva vegnan brunchs purschi sin menaschis purils a Thalkirch,



Alp Steggia en Val Medel e Valendau. Quel a Valendau sil menaschi Turisch ei gia reservaus cumpleinamein. Sin fundament dalla situaziun cul coronavirus ha l'uniun purila scaffiu in concept da protecziun. Quel ensiara buca mo las mesiras da sgirtad, mobein era il diember limitau da participontas e participonts. Mesiras specialas dat ei era pertuccont il buffet culla purschida. «Gest pervia da quella situaziun stattan ils brunchs pigns uonn el center da nossa purschida», di Berchtold.

### Fiasta si d'alp e spel Rein

Brunchs vegnan denton buca mo purschi en Surselva da puras e purs. Era auters menaschis han tals ella gliesta da lur arranschaments da questa stad ([www.surselva.info.ch](http://www.surselva.info.ch)), per exempel ustrias ni era organizaziuns d'event. *Katja Klee* da Surselva Turissem ei surstada dil grond diember da brunchs pigns quest onn: «Aschi biars havein nus aunc mai giu en nossa regiun. Percunter mauncan uonn pliras fiastas pli grondas, capeivlamein per motivs da protecziun pervia dil coronavirus. Il motiv ei

la malsegirtad stada entochen avon paucas jamnas. Negin saveva propi tgei che seigi insumma pusseivel da saver porscher il di dalla fiasta naziunala.» Ei dat denton era autras caschuns da sedivertir quei di. Aschia dat ei a Surcuolm ina fiera cun products indigens ed a Brün in fiug sils aults. Divertiment culs sunatibas dat ei a Breil, leu sepresenta la formaziun «Postabiala Sumvitg» en plirs loghens durant igl entir di. Per tut tgi che vul serender els aults pil di dalla fiasta naziunala seperscha in bi program sill'Alp Ramosa a Vrin. Suenten in survetsch divin suonda in gentar.

### Singuls plaid

Ina fiasta d'emprem d'uost cumbinada cun produziuns e purschida per pign e grond dat ei a Laax. In dils gronds programs da quest onn en Surselva porscha la vischnaunca d'Ilanz/Glion. El center da quella stat il plaid festiv da sora *Madlen Büttler* dalla claustra dominicana da Glion. Era leu dat ei denter auter produziuns dils sunatibas dalla gruppa indigena ni era dalla musica dil marcau. In plaid festiv ei era sil program dalla fiasta digl

emprem d'uost a Surcuolm. Leu sedrezza *Jörg Hertig*, president dalla Cuminonza dils possessurs da secundas habitaziuns Surselva, agl auditori. A Val S. Pieder stat la fiasta naziunala ell'enzenna dalla musica, respectivamein el rom dall'jamna da musica. Silla piazza festiva a Sedrun en Val Tujetsch tegn il president communal *Martin Cavegn* il plaid pigl anniversari dalla Svizra. Era leu ei previu in vast program da divertiment ed era leu denter auter cun sunatibas indigens.

## ... e tgei fa l'aura?

Tenor las prognosas actualas – e co savess ei esser bia auter questa stad – vegn il di dalla fiasta naziunala probabla ad esser signaus d'aura variabla. Durant il di eis ei era da quintar cun plievgia, per part era cun urezis. Medemamein vegnan las temperaturas buca ad esser tenor giavisch.